

Kreado de matematikaj terminoj

Internacia Simpozio pri Lingva Planado kaj Leksikologio

Zagrebo, 2001 07 28–30

Christer Kiselman

Enhavo:

1. Enkonduko
2. Grava distingo
3. Rilato inter preskribo kaj priskribo
4. Ekzemploj de planitaj terminoj el aliaj lingvoj
5. Ekzemploj el esperanto
6. Opinioj, tezoj, konkludoj
Referencoj

1. Enkonduko

Ĉiuj homaj lingvoj estas home kreitaj. Se vi akceptas tiun aserton, ne estas por vi rimarkinde se ĉiuj lingvoj enhavas ankaŭ nove kreitajn elementojn. Mi volas montri al ekzemploj de tiaj elementoj kaj iom videbligi la terminkreadon en la matematika kampo.

Du sintenoj estas kontraŭstaraj en nia rilato al lingvoj: priskribo kaj preskribo. Ili implicas gravan filozofian problemon, sed signalas ankaŭ multajn praktikajn demandojn. La problemo estas filozofia, ĉar temas pri nia sinteno al la mondo; ĝi estas ankaŭ praktika. En ambaŭ kazoj oni povas demandi sin ĉu entute eblas tion fari. Ĉu eblas priskribi iun fenomenon sen influi ĝin? Pli precize: ĉu eblas eldoni gramatikon aŭ vortaron kaj ne influi lingvouzontojn? Aliflanke, ĉu eblas entute preskribi kiel estu lingvo? Se jes, per kiu rajto tio okazas? Kiu havas la praktikajn rimedojn tion fari? Kaj kiu obeos preskribon, kaj kial?

Dum naŭ jaroj mi laboris pri la revizio de *Plena Ilustrita Vortaro*, kaj tial renkontis multajn problemojn ligatajn al la konceptoj de priskribo kaj normigo kiam temas pri matematikaj terminoj. En la nuna artikolo mi prezentos kelkajn el tiuj problemoj.¹ Unue mi konsideros la rilaton inter preskribo kaj priskribo.

2. Grava distingo

La distingo inter priskriba kaj preskriba (alinome normiga) lingva aktiveco estas ege grava kaj ege interesa. Por klarigi ĝin mi uzu metaforon, kiun mi lernis de Klaus Schubert – mi ne scias ĉu li lernis ĝin de iu alia. La birdoj ĉirpas kaj kantas, kaj la ornitologoj priskribas la birdojn kaj ilian ĉirpadon kaj kantadon. La distingo estas tute klara se la ornitologoj estas mamuloj, primatoj, homoj, dum la birdoj ja ne

¹Mi prezentis tiujn pensojn en prelego ĉe la Esperantologia konferenco en Tel-Avivo la 30-an de julio 2000.

estas mamuloj. (Malofte la ornitologoj klopodas preskribi al la birdoj kiel ili kantu.) Sed, se la ornitologoj mem estus birdoj, tiam la distingo estus malklara. Kaj ni esperantistoj ofte estas kaj birdoj, kaj ornitologoj.

La distingo havas rilaton al la nocia paro *artefarita lingvo – natura lingvo*. Nome, oni imagas ke artefaritan lingvon oni unue preskribas kaj poste (eventuale) priskribas, dum naturan oni nur priskribas. Sed mi opinias ke ĉiuj lingvoj estas kreitaj. La diferenco kuŝas en la nombro de personoj kiuj partoprenas en la kreado kaj en la daŭro de la kreado. Do rapida kreado de nur unu persono, ekzemple Zamenhof dum dek jaroj, kontrastas kun kreada procezo de miloj aŭ milionoj da personoj dum miloj da jaroj. Tamen Zamenhof ja utilis aliajn lingvojn en sia kreado, kaj esperanto ja post la publikigo estis kunkreita de aliaj. Komplika situacio! Tamen laŭ mi la nombro de kreantoj kaj la daŭro de kreado estas du parametroj gravaj. Temas pri gradaj diferencoj, ne pri kvalitaj. Evidentas por la lingvoj ke malgranda nombro de kreantoj samvarias kun rapida krea procezo (Volapuko estas ekstrema ekzemplo), kaj ke granda kaj anonima kreantaro estas ligita al longedaŭra procezo. Sed ekzemple la matematikaj terminoj estis kreataj dum longa tempo de relative malmultaj personoj.

La lingvoj apartenas al nia socia realo. Menciindas la verko de Searle (1995), laŭ kiu ĉiuj sociaj institucioj estas konstruitaj, artefaritaj, sed tamen perceptataj de ni ĉiuj kiel realaĵoj. Laŭ li mono, posedaĵoj, geedzeco, registaroj kaj universitatoj ĉiuj ekzistas pro diversaj formoj de homaj interkonsentoj. Tiuj ĉi esence inkludas la kapablon simboligi (1995:228). Apartenas al la konstruitaj institucioj ankaŭ la lingvoj, kiuj eĉ havas konstitucian signifon por la socia realo; kp. Searle (1995:59).

Mi volas vastigi la distingon preskribo–priskribo al alia kampo: al la matematiko.

La matematiko estas vasta teoria sistemo, kiun la homoj kreis – aŭ malkovris. La demando ĉu matematikistoj malkovras matematikon (kiel antaŭe nekonatan kaj nelogatan sed tamen ekzistantan kontinenton) aŭ kreas, inventas matematikon (kiel iun ajn teknikaĵon, antaŭe ne ekzistantan) estas eterna, kaj neniu povis ĝin plene respondi.

La matematiko havas sian priskriban flankon. Oni uzas ĝin por priskribi la movojn de la planedoj. Oni uzas ĝin por antaŭdiri sunajn eklipsojn. Sed tiam oni ne revas pri ŝanĝo de la luna orbito por kaŭzi eklipson. Oni observas, kalkulas, prognozas. Neŭtono malkovris ke la forto kiu altiras pomon estas la sama forto kiu altiras la lunon, kaj ke estas simpla matematika rilato inter distanco kaj altirforto. Sed li ne revis pri ŝanĝo de tiu forto aŭ pri kreado de aliaj fortoj. Temis nur pri priskribo de naturfenomeno kaj pri antaŭdiro, prognozo, de naturfenomeno.

Sed la matematiko havas alian flankon, pli inĝenieran. Oni kalkulas por fari ion, fabriki ion, influi ion. Ekzemplo estas la plej granda maŝino de la planedo: la telefonsistemo. Oni uzis multe da matematiko por kalkuli kiel konstrui kablojn kaj dratojn, aranĝi la ondolongojn, kie meti staciojn de dissendado, kiel akceli la eblecojn ricevi signalojn, ktp. Oni konscie kaj cele konstruis.

Mi pensas ke tiuj du flankoj de la matematiko, la priskriba kaj la inĝeniera, havas rilaton al la lingva temo, ĉar ĉiu lingvo estas, same kiel la matematiko, vasta, sufiĉe abstrakta sistemo, kiun kreis la homoj, kaj kiun homoj ĉiun tagon iomete denove kreas kaj ŝanĝadas. La krea procezo de plej multaj lingvoj ja estas nekonata, anonima, ĉar kreis la lingvon multaj personoj en la pasinteco, kaj multaj faris etajn kontribuojn, ĉiuj parolantoj lernis, aŭ rifuzis lerni ion. Tial nur tiuj proponoj kiuj

estis akceptitaj de la parolantaro plue ekzistas; ĉiuj aliaj estas forgesitaj. Tute simile: nova rezulto en la matematiko estas registrita en la literaturo, sed ĝi pluvivas nur se homoj lernas kaj uzas ĝin. Post iom da tempo povas okazi ke eĉ plej bela teoremo, kiun oni akceptis, estas tiom disvastigita kaj internigita ke oni ne plu povas diri kiu kreis ĝin. La plej alta honoro kiun povas ricevi matematikisto estas ke iu nocio, difino aŭ rezulto estas tiom disvastigita kaj konata de aliaj matematikistoj ke ĉiu pensas ke la nocio estas tre malnova; la difino tute natura; la rezulto memevidenta. Same pri la lingvo ĝenerale. La geniecon oni povas admiri, sed pli ofte oni ĝin akceptas kiel ion memevidentan; ĉiukaze oni ne povas atribui ĝin al iu konata persono. Esperanto ja estas escepto, ĉar ni scias kiu kreis ĝin unue. Sed se ĝi ne estus akceptita de sufiĉe granda nombro de parolantoj, ĝi ne estus pluvivinta ĝis nun.

3. Rilato inter preskribo kaj priskribo

Preskribo kaj priskribo ne povas bone ekzisti sen la alia. Preskribo sen posta priskribo estus senvalora, kvazaŭ oni inventus ion kaj neniam testus la inventaĵon. Nura priskribo estas preskaŭ nebla, ĉar ĉiu lingva aktiveco, ĉu parola, ĉu skriba, ĉu leksikografia, supozigas certan elekton, kaj elekto influas la estontecon. Kiam oni observas ion, oni laŭ la kvantumteorio influas ĝin. Tiu influo povas ja esti ege malgranda, kiel montras la ekzemplo de birdokantado, sed en la kazo de homaj lingvoj la influo ja estas neneglektinda. Kaj precipe en esperanto... . Ĉiu priskribo, se legata de iu, influas la lingvouzadon.

Kiel ekzemplon de la praktika neebleco priskribi sen normigo mi menciuj la novan akademian gramatikon de la sveda lingvo, kvarvoluman, dumil-sepcent-kvardek-kvinpaĝan (Teleman k.a. 1999). Ĝi eksplike, programe kaj laŭ sia komisiono formulita de la Sveda akademio havas ambicion priskriban, ne normigan, sed ĝi tamen, ofte malrekte, enhavas multajn normigajn eldirojn – cetere bonvenigitajn de la legantaro. Ne nur temas pri tio ke nemenciita lingva fenomeno aŭtomate ricevas statuson sub la menciitaj. Temas ankaŭ pri klasado de esprimoj en dialektajn kaj regionajn. Temas pri cititaj eldiroj de t.n. lingvoflegantoj.

La matematikistoj libere inventas terminojn. Nu, libere – kion signifas entute libereco? – mi volas diri ke se matematikisto malkovras aŭ inventas iun abstraktan strukturon, ŝi donas al ĝi iun nomon, kaj principe rajtas doni kiun ajn nomon al kiu ajn koncepto. Tio ŝajnas tre arbitra, tro arbitra, kaj jes, tiel estas. Sed kompreneble la libereco ne estas tute senbrida: oni ja almenaŭ devas sekvi la bonan guston, kaj la bona gusto povas starigi tre severajn limigojn. Sed la principo de libereco estas grava. Kaj tio ankaŭ signifas ke la matematikaj terminoj estas tre ĥaosaj, kaj tute ne estas tiel logike kaj ordige elpensitaj kiel oni povus imagi pri tiu scienco.

4. Ekzemploj de planitaj terminoj el aliaj lingvoj

Kredeble en ĉiu lingvo ekzistas vortoj eltrovitaj en moderna tempo. Mi menciuj kiel ekzemplojn kelkajn terminojn en la sveda, la islanda kaj la franca.

4.1. El la sveda

Komputilo nomiĝas en la sveda *dator*. La vorto similas al *motor* ‘motoro’; do aludas al iu maŝino kiu traktas datenojn – ni povus diri en esperanto “datenoro” aŭ

“datenatoro”.² Ĝi estas ekzemplo de koscia interveno. Laŭ La vortaro de la nacia enciklopedio (1995:1:267) ĝi ekzistas en la lingvo ekde 1969. Mi ne scias kiu eltrovis ĝin. Certe estas feliĉe elektita termino, ĉar ĝi estas facile enmetebla en la lingvon analoge al *motor*, kaj oni tial evitas terminon *computer*, kies pluralo estus ne evidenta en la sveda.

Alia ekzemplo el la sveda estas *plast* ‘plasto’, materialo konstruita, kiu disvastiĝis antaŭ kvindek jaroj. Ĝi ekzistas en la sveda ekde 1946 (La vortaro de la nacia enciklopedio 1996:2:588). En la komenco oni diris en la sveda *plastic* laŭ la angla, sed tiam oni havis problemon kun la sveda fleksio. Iu mallongigis al *plast*, kaj ĝi facile eniris la lingvon.

Sed kiu obeas al lingvoplanado? Ne estas facile obeigi popolon. La kazoj de *komputilo* kaj *plasto* estis sukcesaj: la nova termino enradikiĝis kaj estas nun uzata de ĉiuj parolantoj, post nur ioma hezito en la komenco. Ni rigardu alian ekzemplon, tiu de *pordo*. La esperanta vorto *pordo* signifas laŭ PIV unue la liberan spacon kiu permesas eniron,³ due la klapregon kiu fermas tiun spacon. La responda sveda vorto estas *dörr*, kiu en la nuna sveda unuavice signifas la moveblan klapregon: tiu estas la signifo kiun donas al la vorto La vortaro de la nacia enciklopedio (*Nationalencyklopedins ordbok* 1995:1:329). Sed en la tekniko oni donas al ĝi alian signifon: la klaprego kune kun ties kadro, do inklude de la nmovebla kadro en kiu pendas la klaprego. La moveblan parton oni nomas en la tekniko *dörrblad*, laŭvorte “pordofolio”. Kaj efektive, se vi konstruas domon kaj volas aĉeti ducent pordojn, vi devas scii ĉu vi ricevos ducent pordojn kun aŭ sen kadroj. Tiu difino de la vorto estas uzata en la konstrua industrio, kaj estas kompreneble grava tie. La Sveda nacia enciklopedio (*Nationalencyklopedin* 1991:5:234) enhavas artikolon *dörr*, kiu senkomente uzas la teknikan lingvaĵon. Sed en la ĉiutaga vivo *dörr* signifas nur tiun moveblan parton, tiun “pordofolion”. La vorto *dörrblad* ne estas menciita en La vortaro de la nacia enciklopedio (*Nationalencyklopedins ordbok* 1995:1:329); same mankas tiu teknika vorto en La vortaro de la Sveda akademio (*Svenska akademiens ordlista* 1998). Ni povas konstati plenan apartigon de la faka lingvo disde la ĉiutaga lingvo laŭ la prezentoj en La nacia enciklopedio el 1991 respektive La vortaro de la nacia enciklopedio el 1995.

Kiel estiĝis tiu disigo? Verŝajne ne estas tiel simple ke la normigistoj de la teknika lingvaĵo eltrovis signifon de vorto kiun la ĉiutaga lingvo ne posedis. La vortaro de la Sveda akademio (SAOB 1925:7:D2612; la artikolo estis presita en 1923) donas kiel unuan signifon de la vorto *dörr* ‘la malfermita spaco kune kun sia kadro kaj (kutime) kun la klaprego’; kiel duan signifon ‘klaprego’. Tio indikas ke la unua signifo malaperis el la ĉiutaga lingvo post 1923 kaj tial ne estis registrita en la vortaro de 1995; dume la teknika lingvaĵo fiksas tiun difinon, nun malaperintan el la ĝenerala lingvaĵo.

Mia fina sveda ekzemplo estas tiu de apuso, *Apus apus* (L.) (familio Apusedoj, Apodidae; ordo Apusoformaj, Apodiformes). Tiu birdo, ege bona flugisto, loĝas en

²Tamen la origina latina signifo estas ‘donanto’. La aliaj similaj terminoj finiĝantaj per *-or* havas rektan rilaton al la elira vorto: *motor* “movanto”, *generator* “estiĝanto”, *monitor* “avertanto”, dum *dator* do nun ne signifas “donanto” sed “traktanto de donitaĵoj”. Pro tiu ŝanĝo de la origina signifo la vorto *dator* laŭ Ebbe Vilborg (persona komunikado 2000 08 17) neniam estus povinta ricevi internacian aprobon.

³Kaj tiu ŝajne estas la origina hind-eŭropa signifo.

Svedio dum la norda somero, kaj ĉiam vekis intereson. Ĝia kutima sveda nomo estas *tornsvala*, laŭvorte “turhirundo”, kiu ekzistas en la lingvo almenaŭ ekde 1836 (La vortaro de la nacia enciklopedio 1996:3:379). Tamen ĝi havis multajn nomojn, el kiuj la plej malnova en la sveda estas *ringsvala*, laŭvorte “ringohirundo”. Aliaj popolaj nomoj estas *spirsvala* “sceptrohirundo”, *regnsvala* “pluvohirundo”, *regnspira* “pluvosceptro”, *kyrksvala* “preĝejohirundo”, *skogssvala* “arbarohirundo”, *långvinge* “longflugilulo”, *djävulsfågel* “diablobirdo”, *nattsvala* “noktohirundo”. Nu, ĉiuj tiuj nomoj ne estis uzataj samtempe en unu loko, sed en pluraj regionoj kaj dum diversaj periodoj. Sed la ekzemploj montras ke tiu birdo movis la popolan fantazion.⁴

Iam dum la sepdekaj jaroj ordigemaj ornitologoj decidis ke tiuj nomoj ne taŭgas, ĉar plejparte ili indikas ke la birdo estas hirundo, kio ĝi ne estas (ĝi apartenas al alia ordo ol la hirundoj). Ĝi similas al hirundo, kaj flugas iom simile (eĉ pli bone), sed ne estas tre proksime parenca al la hirundoj. Oni do decidis ke la nomo *tornsvala* “turhirundo” estas maltrafa, misinstrua, kaj tial volis forigi ĝin. Oni inventis la nomon *tornseglare*, laŭvorte “turvelulo”.⁵ Ĉar temis pri la ornitologia societo en Svedio oni sukcesis enigi ĝin en multajn ornitologiajn librojn. Laŭ La vortaro de la nacia enciklopedio (1996:3:379) la vorto estas registrita kiel sveda vorto ekde 1978. Sed multaj personoj tamen diras “tornsvala”. Mi unue lernis kiel infano la nomon *tornsvala*, poste dum kelka tempo transiris al *tornseglare*, sed nun decidis reiri al la malnova nomo. El miaj tri infanoj unu uzas la novan nomon, ĉar li lernis en la lernejo aŭ en ornitologiaj rondoj ke la apuso ne estas vera hirundo. Du el ili uzas la malnovan *tornsvala* “turhirundo”; unu opinias ke estas stulte ŝanĝi ĉiutagajn nomojn kiam oni ŝanĝas la kladikon. “Eble la aliaj hirundoj ne estas veraj hirundoj”, li moke aldonas.

4.2. El la islanda

Ekzemplo el la islanda lingvo estas *tölva* ‘komputilo’. La vorto rememorigas pri *völva* ‘aŭguristino, antaŭdiristino’, kaj devenas de *tala* ‘numero’, kies fleksiaj formoj enhavas modifitan trunkon *töl-*, ekzemple *tölnur* ‘nombroj’, *tölvísi* ‘aritmetiko’, *tölfræði* ‘statistiko’, *tölugildi* ‘nombra valoro’, *tölorð* ‘numeralo’. Do estas maŝino kiu rakontas pri nombroj same kiel aŭguristino rakontas pri la estonteco. Tre bone trovita termino! Elpensis ĝin ĉirkaŭ 1966 profesoro Sigurður Nordal, islanda ambasadoro en Danlando. Kiam mi estis en Islando kaj parolis kun la estro de *Íslensk málstöð* ‘La Islanda lingvocentro’, profesoro Baldur Jónsson, li montris al mi la lokon ekster la Lingvocentro kie staris Nordal. (Tio okazis la 12-an de aŭgusto 1993.) “Tie li staris kaj atendis taksion. Kaj subite venis al lia kapo tiu termino! Li prononcis ĝin, saltis en la taksion kaj veturis hejmen.” Malofte ni posedas tiel detalan informon pri la deveno de nova vorto. Tiu okazaĵo konfirmas la regulon ke ni ĝenerale tute ne konas la eltrovinton de nova vorto.

⁴La angla nomo de la birdo, *swift*, estas ege bona, ĉar la adjektivo *swift* implicas grandan rapidon kombinitan kun facileco de movo. La rusa nomo, *стриж*, eble estas eĉ pli bona, ĉar ĝi memorigas pri *стрижка* ‘tondo’, kaj la movoj de la birdo efektive signalas “tond’!, tond’!”. Eble la esperanta nomo de tiu rapidega birdo devus esti pli mallonga, do *apo* (ne okupita) anstataŭ *apuso*.

⁵En la germana jam pli frue okazis simila transiro de *Turmschwalbe*, *Mauerschwalbe*, laŭvorte “turhirundo, murhirundo”, al nova nomo *Mauersegler*, “murvelulo”.

Cetere rimarkigindas ke tre multajn islandajn matematikajn terminojn kreis malgranda grupo de islandaj matematikistoj. La matematikista islanda lingvo estas artefarita ĝis tre alta grado, proksimume kiel en esperanto, kies terminoj fakte estis kreitaj de pli multaj personoj kaj dum pli longa tempo ol la islandaj. Kiam temas pri matematiko, la islanda estas do pli artefarita ol esperanto, se oni rajtas mezuri artefaritecon per la grandeco de la kreantaro kaj la daŭro de la krea procezo.

4.3. El la franca

Ekzemplo el la franca estas la vorto *fractal* ‘frakto’. Ĝin enkondukis Benoit Mandelbrot antaŭ tridek jaroj. Li priskribis... aŭ malkovris... aŭ inventis... koncepton, tiun de frakto, kaj li montris kiel tiu nocio taŭgas por modeligi multajn fenomenojn en la naturo. Kaj tial li ja rajtis doni al ĝi nomon. Li elektis la terminon *fractal*, kiu memorigas pri io rompita, frakasita – frakcio ja estas iel rompita nombro.⁶

La pluralo de *fractal* estas *fractals* kun *-s*, do ne kiel la kutima franca fleksio de *cheval*, *chevaux* kun *-aux*. La franca posedas nur kelkajn substantivojn kiuj finiĝas plurale per *-als*. Grevisse (1964:217) listigas unue ses:

bal, cal, carnaval, chacal, festival, régala,

kaj poste dudek tri, malpli oftajn:

aval, bacchanal, bancal, cantal, caracal, cérémonial, choral, copal, corral, final, galgal, gavial, gayal, mal, minerval, mistral, narval, nopal, pal, récital, rorqual, santal, serval.

Oni devas lerni tiujn esceptojn parkere (almenaŭ la ses, eble ne la dudek tri); la plimulto obeas al la modelo *cheval*, *chevaux* ‘ĉevalo, ĉevaloj’, la esceptoj al la modelo *chacal*, *chacals* ‘ŝakalo, ŝakaloj’.

Kial do Mandelbrot elektis pluralon *fractals* kaj ne iun “*fractaux*”? Simpla klarigo povus esti ke la klaso de la substantivoj kiaj *cheval*, *chevaux* estas malnova, historie difinita kaj tial fermita; alivorte ĝi ne povas ricevi novajn membrojn. Ĉiuj novaj vortoj finiĝantaj per *-al* sekve devas aparteni al la klaso de *gavial*, *gavials*. Fakte tio estis mia unua penso. Eble Mandelbrot tutsimple opiniis ke la vortoj finiĝantaj per *-aux* en pluralo estas travivintaj esceptoj. Tamen rimarkigindas ke Grevisse kaj aliaj gvidlibroj listigas ne la pluralojn finiĝantajn per *-aux* sed tiujn finiĝantajn per *-als*, kvazaŭ la lastaj formus fermitan klason. Temas pri esceptoj de la esceptoj. Mi ne povas mem formi firman opinion pri tio. En februaro 1997 mi havis eblecon demandi la aŭtoron de la termino. Li ne donis al mi tre klaran respondon.

Sed alia franca matematikisto, Adrien Douady, kiun mi demandis en julio 2000, prezentis al mi alian, pli ruzan kaj tre interesan klarigon. Nome, la francaj lernejoj ja devas parkere lerni la esceptajn substantivojn: *bal, cal, carnaval, chacal,...* kaj nun ili devas, aŭ almenaŭ devus, lerni novan escepton: *bal, cal, carnaval, chacal, festival, fractal,...* Tiel Mandelbrot faris por sia bebo novan escepton en la franca gramatiko,

⁶La difino en la venonta eldono de PIV tekstas: “Geometria figuro kun riĉa detala strukturo je ajne malgranda skalo, ofte tro malregula por esti priskribita per la tradicia geometrio, k kun ne nepre entjera Hausdorff-a dimensio”, kaj estas aldonita prudenta rimarkigo: “Oni ankoraŭ ne fiksas striktan matematikan difinon de tiu termino.”

kaj lia termino do faros pli grandan impreson al la lernantoj. Tiel li uzis pure lingvajn rimedojn por konatigi sian novan koncepton. Estas ja pli impresive aldoni ion al la gramatiko de lingvo ol al ties vortprovizo. Sed ĉu *fractal* eniros la unuan liston de ses aŭ nur la duan de dudek tri?

Kaj, aldonis Adrien Douady: Mandelbrot estas sufiĉe granda por permesi al si tian intervenon en la franca gramatiko. Nu, ĉio ĉi estas la persona cerbumado de Douady, kaj oni ne povas diri ke ĝi estas konfirmita. Mi ne renkontis Mandelbrot post mia ekscio de la ideo de Douady, kaj ne scias kiel li reagis al ĝi.

5. Ekzemploj el esperanto

La rilato inter la ĉiutaga lingvaĵo kaj tiu uzata en iu scienco estas subtila. La faklingvo ja estas bazita sur la ĝenerala lingvo, sed oni aldonas novajn terminojn, ofte t.n. klerajn vortojn; tamen oni kelkfoje anstataŭe donas al jam ekzistantaj ĉiutagaj vortoj specifan signifon. La matematikistoj parolas pri grupoj, ringoj, korpoj kaj familioj, vortoj kies matematikaj signifoj estas nediveneblaj sen antaŭa studado. En la matematika lingvaĵo de multaj naciaj lingvoj la kleraj terminoj estas relative malmultaj; anstataŭe oni uzas ĉiutagajn vortojn kaj redifinas ilin. Ĉar tiu modelo estas forte tradicia oni sekvas ĝin ankaŭ en esperanto. Tial fakte la eltrovo de esperantaj matematikaj terminoj estas pli facila ol en multaj aliaj sciencoj.

Maurice Fréchet (1878–1973) estis fama matematikisto, kiu publikigis plurajn gravajn verkojn en esperanto en konataj sciencaj revuoj (ne esperantlingvaj, sed tute ordinaraĵaj, elstaraj revuoj). Liaj artikoloj estas kvazaŭ preskriboj, ĉar li verkante kreadis terminojn, same kiel matematikistoj ĉiam faras, kvankam ne tiom abunde.

Mi menciuj kelkajn ekzemplon el *Plena Ilustrita Vortaro* (PIV) kaj ties *Suplemento* (PIVS).

Unue pri la adjektivo *finia*. En la ĉiutaga vivo oni povas diri *senfina* anstataŭ *finia*, sed tio ne taŭgas en la matematiko, ĉar ordita aro povas esti nefinia kaj tamen havi finon. Pro simila kaŭzo *finita* ne taŭgas en scienca uzado – eĉ nefinia laboro povas esti finita. Do certe ni bezonas distingigan nomon por tiu koncepto.

La adjektivo *finia* aperas en PIV kun la difino “Tia, ke ĝia absoluta valoro estas ne infinita kaj ne superas certan limon, eĉ se ĝi estas difinita per senfina serio da kvantoj.” Ni notas ke la nocio estas difinita pere de *infinita*, adjektivo derivita de *infinito*, kies difino tekstas: “Senlima granda, spaco aŭ malproksimo.” Do *finia* simple estas ‘ne infinita’, kiu siavice signifas ‘ne senlima’. En PIVS oni malrekomendas la adjektivon *finia* kaj enkondukas anstataŭe la substantivon *fajnajto*, kies difino tekstas: “Nombro, kiu troviĝas inter du entjeroj.” Do fajnajto estas sinonimo de reela nombro. Ni rimarkigu ke oni ne difinas ekzemple finian aron. En la nova eldono de PIV, nomata PIV2, ankoraŭ ne aperinta, aperos la adjektivo *finia*, nun kun tri difinoj:

- a) (parolante pri aroj) Havanta nombron de elementoj egalan al unu el la nombroj 0, 1, 2, 3, ... : *finia aro estas numerebla*.
- b) (parolante pri kardinala nombro) Estanta unu el la nombroj 0, 1, 2, 3,
- c) (ĝenerale) Ne egala al unu el la nefinioj: *funkcio kun finiaj valoroj*.

La vorto *fajnajto* ne aperas, ĉar neniu laŭ mia scio uzis ĝin en iu publikigita matematika teksto, dum *finia* aperis multloke. Mallonge: la enkonduko de *finia* estis sukcesa lingvoplanado; la enkonduko de *fajnajto* ne.

PIV enhavas la signifon de ‘proporcio’ ankaŭ sub la kapvorto *raporto*. Krome sub la kapvorto *rilato* aperas *rilatumo* kun tiu signifo, kun resendo al *raporto* 4, kiu do estas la ĉefa vorto. La nocio havas tri esprimojn, *proporcio*, *raporto* kaj *rilatumo*, el kiu la lasta havas la plej malaltan statuson. En PIVS oni malaprobas kaj *raporto* kaj *rilatumo* kaj enkondukas novan vorton *rejŝo*. En PIV2 ni konservas *proporcio* kaj *rilatumo*; ni malrekomendas *raporto* en tiu senco (kiun mi opinias francismo) kaj resendas al *proporcio* kaj *rilatumo*. Mi opinias ke la enkonduko de *rejŝo* estis malsukcesa klopodo de lingvoplanado.

Pri *frakto* mi jam parolis kiam temis pri franca ekzemplo. Mi povas mencii ke mi vidis “*fraktalo*” en esperantlingva artikolo. Sed mi opinias ke *frakto* pli bone kongruas kun la vortfarado en esperanto. Tio signifas ke ni faris iom da lingva planado en PIV2. Ni parolu pri la frakta geometrio de la naturo!

6. Opinioj, tezoj, konkludoj

1. La distingo inter priskribo kaj preskribo estas klara kiam temas pri birdoj kaj ornitologoj nebirdaj, sed kiam temas pri homaj lingvoj kaj homaj lingvistoj ĝi estas malpli klara.
2. La diferenco inter esperanto kaj aliaj lingvoj kiam temas pri planado kaj kreado de vortoj estas ne kvalita sed nur grada. Por mezuri tion diferencon, eblaj mezuriloj estas la nombro de kreantoj kaj la daŭro de la krea procezo.
3. La matematiko havas priskriban kaj preskriban flankon. La analogio al lingva aktiveco priskriba kaj preskriba povas esti pensinstiga.
4. Matematikistoj abunde kreas terminojn kaj ŝanĝadas la signifojn de malnovaj terminoj.
5. Se lingva komunumo estas tre malgranda, la distingo inter preskribo kaj priskribo malaperas. Ekzemple la esperantlingvaj matematikistoj estas tiom malmultaj ke ni ĉiuj estas kaj birdoj kaj ornitologoj. Se, male, lingva komunumo estas tre granda, preskribo fariĝas malfacilega.
6. La plej fortan povon de preskribo oni havas kiam homoj pensas ke oni ne preskribas.

Referencoj

Grevisse, Maurice (1964): *Le bon usage. Grammaire française avec des remarques sur la langue française d’aujourd’hui*. 8-a eldono, 1194 pp. Gembloux: Éditions J. Duculot; Parizo: Librairie A. Hatier.

Nationalencyklopedin [La nacia enciklopedio] (1989–1996). Dudek volumoj. Höganäs: Bokförlaget Bra Böcker.

Nationalencyklopedins ordbok [La vortaro de la Nacia enciklopedio] (1995–1996). Tri volumoj. 654 + 666 + 639 pp. Höganäs: Bokförlaget Bra Böcker.

Plena Ilustrita Vortaro de Esperanto (PIV) (1977). Parizo: Sennacieca Asocio Tutmonda. xxxvii + 1303 pp.

Plena Ilustrita Vortaro de Esperanto. Suplemento (PIVS) (1987). Parizo: Sennacieca Asocio Tutmonda. 45 pp.

Searle, John R. (1995): *The Construction of Social Reality*. London: Allen Lane; The Penguin Press. xiii + 241 pp.

Svenska Akademien (1898–) [La sveda akademio]: *Ordbok öfver svenska språket* (SAOB) [Vortaro de la sveda lingvo]. 1–. Lund: Gleerupska Universitetsbokhandeln.

— (1998): *Svenska Akademiens ordlista [La vortlisto de la Sveda akademio]* (SAOL). 12-a eldono. XXXVIII + 1066 pp. Stokholmo: Norstedts ordbok (distribuo).

Teleman, Ulf; Hellberg, Staffan; Andersson, Erik (1999): *Svenska Akademiens grammatik [La grammatiko de la Sveda akademio]* (SAG), 1–4. Stockholmo: La Sveda akademio. 296 + 768 + 704 + 977 pp.

Adreso de la aŭtoro: Upsala universitato, Matematika instituto,
Poŝtkesto 480, SE-751 06 Uppsala, Svedio.

Telefono: +46 18 4713216 (oficejen); +46 18 300708 (hejmen)

Faksilo: +46 18 4713201

Retpoŝta adreso: kiselman@math.uu.se

URL: <http://www.math.uu.se/~kiselman>

Christer Kiselman estas profesoro pri matematiko ĉe la Upsala universitato kaj vicprezidanto de la Akademio de Esperanto. Liaj esplorinteresoj estas i.a. plurdimensia kompleksa analitiko kaj geometrio, la teorio pri konvekseco kaj, lastatempe, diĝita geometrio. Li redaktas la revuon *Esperantologio / Esperanto Studies*.